

## ANEXO VI

EXPEDIENTE
CÓDIGO DO PROCEDEMENTO

## FICHA DE SOLICITUDE DE TRANSFERENCIA BANCARIA

TITULAR DA CONTA		DNI/NIF	
ENDEREZO			
LOCALIDADE (INDICAR CP)			TELÉFONO
<b>DATOS DA CONTA</b>			
CÓDIGO BANCO	CÓDIGO SUCURSAL	D.C.	CÓDIGO DA CONTA
BANCO			
ENDEREZO		CP	LOCALIDADE

**CERTIFICO:**

Que os datos arriba reflectidos son correctos e que lle corresponden ao titular e número de conta.

\_\_\_\_\_ , \_\_\_\_ de \_\_\_\_\_ de \_\_\_\_ de 200\_ .

SINATURA DO SOLICITANTE

SINATURA E SELO DA ENTIDADE FINANCEIRA

*Orde do 20 de marzo de 2006 pola que se establecen as bases reguladoras do programa para a promoción do emprego autónomo cofinanciado polo Fondo Social Europeo e se procede á súa convocatoria para o ano 2006.*

No marco establecido no artigo 40 da Constitución española, na Lei 56/2003, do 16 de decembro, de emprego, nos artigos 29 e 30 do Estatuto de autonomía de Galicia, nos obxectivos de crecemento e emprego da Unión Europea, conforme a Extratexia Europea de Emprego, e na Declaración Institucional polo Diálogo Social en Galicia, asinada o 5 de novembro de 2005, entre a Xunta de Galicia, e as organizacións sindicais e empresariais, e co obxectivo de que a Comunidade Autónoma de Galicia acadase os maiores niveis de desenvolvemento económico,

de calidade no emprego, de benestar social, e de cohesión no territorio, é preciso adoptar políticas que promovan a calidade dun modelo de desenvolvemento económico que favoreza a capacidade de toda a sociedade galega para crear emprego.

Neste sentido, o desenvolvemento das políticas activas de emprego na nosa comunidade autónoma, no marco de actuación sinalado, permite adecuar uns instrumentos que configuran o emprego como factor clave da política económica e social na procura de metas máis ambiciosas no progreso de Galicia. No obxectivo principal da creación de emprego é necesario potenciar a capacidade creativa e emprendedora da sociedade galega, en especial dos mozos e mozas, como fonte de riqueza e como elemento esencial para o crecemento, a competitividade e a modernización do tecido produtivo galego.

Conforme este obxectivo as diversas medidas de promoción do emprego postas en práctica pola comunidade autónoma complétanse con medidas específicas de fomento da cultura emprendedora e de apoio a actividades e iniciativas de autoemprego.

De conformidade co Decreto 168/1984, do 15 de novembro, de asunción de funcións e servizos transferidos, correspóndelle á comunidade autónoma a xestión de calquera tipo de axuda, subvencións e préstamos que realizaba o Fondo Nacional de Protección ao Traballo, e de acordo co disposto no Decreto 536/2005, do 6 de outubro, polo que se establece a estrutura orgánica da Consellería de Traballo, correspóndelle a esta o exercicio das anteditas competencias e funcións, entre outras materias, no relativo ás políticas activas de emprego.

Neste contexto de actuación nesta orde regúlase o programa de promoción do emprego autónomo, e procédese á súa convocatoria para o ano 2006. As actuacións previstas nesta orde están cofinanciadas polo Fondo Social Europeo nun 65%, no Programa Operativo Plurirrexional de Fomento do Emprego, e nun 75% no Programa Operativo Integrado de Galicia 2000-2006.

As bases reguladoras e a convocatoria deste programa axústanse ao disposto no artigo 78 do texto refundido da Lei de réxime financeiro e orzamentario de Galicia, aprobado polo Decreto lexislativo 1/1999, do 7 de outubro, na súa redacción dada pola Lei 14/2004, do 29 de decembro, de medidas tributarias e de réxime administrativo, na Lei de orzamentos xerais da Comunidade Autónoma de Galicia, no Decreto 287/2000, do 21 de novembro, polo que se desenvolve o réxime de axudas e subvencións públicas da Comunidade Autónoma de Galicia, e no que resulte de aplicación a Lei 38/2003, do 17 de novembro, xeral de subvencións.

Por todo o exposto, no desenvolvemento da planificación presentada ante o Comité Autonómico de Emprego, na súa reunión do día 18 de xaneiro de 2006, consultado o Consello Galego de Relacións Laborais, e no exercicio das facultades que me confire o artigo 34 da Lei 1/1983, do 22 de febreiro, reguladora da Xunta e do seu presidente,

### DISPOÑO:

#### Capítulo I

#### Finalidade, ámbito e principios de xestión

##### Artigo 1º.-Obxecto e finalidade.

1. Esta orde ten por obxecto fixar as bases reguladoras do programa de promoción do emprego autónomo, coa finalidade de promover e axudar a financiar aqueles proxectos empresariais que facilitan a creación do seu propio posto de traballo ás persoas desempregadas que pretendan desenvolver a súa actividade empresarial ou profesional en Galicia como traballadores ou traballadoras autónomos/as ou por conta propia, e se procede á súa convocatoria para o ano 2006.

2. As solicitudes, tramitación e concesión das axudas do programa de promoción do emprego autónomo axustaranse ao disposto no texto refundido da Lei de réxime financeiro e orzamentario de Galicia, na Lei de orzamentos xerais da Comunidade Autónoma de Galicia, no Decreto 287/2000, do 21 de novembro, e nesta orde.

3. A xestión deste programa realizarase de acordo cos seguintes principios:

- a) Publicidade, concorrencia, obxectividade, transparencia, igualdade e non discriminación.
- b) Eficacia no cumprimento dos obxectivos fixados.
- c) Eficiencia na asignación e na utilización dos recursos públicos.

#### Artigo 2º.-Beneficiarios.

1. Poderán ser beneficiarias das axudas deste programa as persoas desempregadas inscritas como demandantes de emprego no Servizo Público de Emprego, que procedan á creación do seu propio posto de traballo mediante a súa constitución en traballadores ou traballadoras autónomos/as ou por conta propia, sempre que:

-Sexan titulares ou cotitulares do negocio ou explotación ou ben constitúan unha sociedade limitada que cumpra os requisitos establecidos no número 3 deste artigo.

-Se dean de alta no réxime especial de autónomos ou no réxime especial do mar da Seguridade Social ou en mutualidade de colexio profesional.

-Non percibisen subvencións ao abeiro do programa de promoción do emprego autónomo nos catro anos anteriores á data do inicio da nova actividade.

-Non desenvolvesen como traballadores ou traballadoras autónomos/as a mesma ou similar actividade na mesma localidade, nos 6 meses inmediatamente anteriores á data do inicio da nova actividade, nin estivesen de alta como traballadores ou traballadoras autónomos/as en calquera réxime da Seguridade Social ou en mutualidade de colexio profesional, sempre que a dita situación de alta presupoña actividade, nos tres meses inmediatamente anteriores.

Para os efectos deste programa, tamén terán a consideración de beneficiarios os traballadores e traballadoras que figuren inscritos/as como demandantes de emprego no Servizo Público de Emprego e realicen un traballo por conta allea cunha prestación de servizos inferior ou igual a 2 horas diarias, 12 semanais ou 48 mensuais, e sempre que cumpran as condicións establecidas neste punto.

2. Para os efectos deste programa, entenderase como data de inicio de actividade laboral a da alta como autónomo no correspondente réxime da Seguridade Social ou en mutualidade de colexio profesional.

3. Poderán ser beneficiarias da axuda prevista no artigo 4º desta orde as sociedades limitadas, sempre que:

-Sexan sociedades de nova creación cun capital social fundacional inferior a 120.200 €.

-Todos os seus socios/as sexan persoas físicas e o número inicial de socios/as non sexa superior a tres, agás que todos os socios/as reúnan os requisitos e condicións establecidos no número 1 deste artigo e pertencen a algún dos seguintes colectivos:

- a) Mozos e mozas menores de 25 anos.
- b) Mozos e mozas maiores de 25 anos e menores de 30 que finalizaran a súa educación a tempo completo nos dous anos anteriores á súa alta na Seguridade Social ou mutualidade de colexio profesional e que non tiveran antes un primeiro emprego fixo.
- c) Persoas desempregadas maiores de 45 anos.
- d) Mulleres desempregadas que inicien a súa actividade laboral tras unha ausencia do mercado de traballo non inferior a 24 meses.
- e) Mulleres desempregadas que se incorporen para prestar servizos en profesións ou ocupacións con menor índice de emprego feminino, de acordo co disposto na orde do Ministerio de Traballo e Asuntos Sociais do 16 de setembro de 1998 (BOE do 29 de setembro).
- f) Persoas titulares de familias monoparentais e con cargas familiares.
- g) Persoas desempregadas que realizasen, no ano da presentación da solicitude, ou nos dous anos naturais anteriores, cursos de formación profesional ocupacional do Plan FIP directamente relacionados co posto de traballo ao que se incorporan.
- h) Persoas desempregadas que participasen, no ano de presentación da solicitude ou nos dous anos anteriores, como alumnos/as en escolas obradoiro, casas de oficio ou en obradoiros de emprego directamente relacionadas no seu contido co posto de traballo ao que se incorporan; ou ben, que traballasen no ano da presentación da solicitude ou no ano natural anterior en obras ou servizos de interese xeral realizados en virtude doutros programas de fomento do emprego.
- i) Persoas desempregadas de longa duración, maiores de 25 anos, que estivesen sen traballo e inscritos na oficina de emprego durante 12 meses dos anteriores 16 meses.
- j) Persoas desempregadas con discapacidade cun grao de minusvalidez non inferior ao 33%.
- k) Persoas desempregadas procedentes de empresas en crise.
- l) Persoas desempregadas en situación de risco de exclusión social pertencentes a algún dos seguintes colectivos:

-Perceptores/as da Renda de Integración Social de Galicia ou aqueles/as que non poidan acceder a ela, ben por falta do período exixido de residencia ou empadramento, ou ben por ter esgotado o período

máximo de percepción legalmente establecido, ou membros da súa unidade familiar en desemprego.

-Persoas que participen ou participasen en procesos de rehabilitación ou reinserción social de drogodependentes debidamente acreditados ou autorizados.

-Internos/as de centros penitenciarios cuxa situación penitenciaria lles permita acceder a un emprego, así como liberados/as condicionais ou ex-reclusos/as que non tivesen antes un primeiro emprego fixo remunerado tras un período de privación de liberdade.

-Mulleres procedentes de casas de acollida que presenten problemas adicionais de inserción ou reinserción laboral.

-As persoas que teñan acreditada pola Administración competente a condición de vítima de violencia doméstica por parte dalgún membro da unidade familiar de convivencia.

-Mulleres que abandonaran o exercicio da prostitución e se incorporen ao mercado laboral.

-Menores internos/as incluídos no ámbito de aplicación da Lei orgánica 5/2000, do 12 de xaneiro, reguladora da responsabilidade penal dos menores, cuxa situación lles permita acceder a un emprego, así como os/as que estean en situación de liberdade vixiada e os ex-reclusos.

-Mozos e mozas que estean ou estivesen ata a súa maioría de idade baixo a tutela ou garda da Administración autonómica.

-Traballadores e traballadoras inmigrantes que pasen a ser residentes da comunidade cuxas características condicionen a súa integración social.

-Emigrantes retornados/as con graves necesidades persoais ou familiares.

-Persoas que formen parte de colectivos ou minorías cuxas características poidan condicionar as súas posibilidades de integración social.

4. Non poderán obter a condición de beneficiarios do programa regulado nesta orde as persoas ou entidades nas que concorran as circunstancias previstas no artigo 13.2º da Lei 38/2003, do 17 de novembro, xeral de subvencións.

Artigo 3º.-Concepto de persoa desempregada.

Para os efectos das axudas previstas nesta orde, terán a consideración de persoas desempregadas aquelas que figuren inscritas como demandantes de emprego no Servizo Público de Emprego e que, pola súa vez, carezan de ocupación segundo o informe da vida laboral da Tesouraría Xeral da Seguridade Social e, se é o caso, segundo certificado da mutualidade do colexio profesional, na data da súa alta no correspondente réxime da Seguridade Social ou mutualidade de colexio profesional.

## Capítulo II Tipos de axuda

### Artigo 4º.-Subvención financeira.

1. A subvención financeira ten por finalidade facilitar a creación do seu propio posto de traballo mediante a redución de xuros de préstamos necesarios para a súa constitución como traballador ou traballadora autónomo/a, tendo en conta que, como mínimo, o 75% do préstamo deberá destinarse a financiar investimentos en activo fixo, podendo destinarse ata un 25% a financiar o activo circulante. Os ditos préstamos, para seren subvencionables, deberán ser concedidos polas entidades financeiras que teñan subscrito convenio coa Consellería de Traballo.

Esta subvención, pagadoira dunha soa vez, será como máximo de catro puntos do tipo de xuro fixado pola entidade financeira que conceda o préstamo, sen que, en ningún caso, o tipo de xuro que deba satisfacer o beneficiario, despois de calculada a subsidiación, poida resultar inferior a un punto. A contía calcularase como se a subvención se devengase cada ano de duración do préstamo, incluído o posible período de carencia. O importe máximo desta subvención non poderá superar a contía de 3.000 €.

A subvención financeira deberá presentarse con anterioridade ao inicio da execución do proxecto de investimento e, en todo caso, antes de transcorresen 2 meses desde a data de alta na Seguridade Social ou mutualidade de colexio profesional, respectando, en todo caso, o prazo xeral establecido no artigo 8º.4 de esta orde, aínda que non transcorresen os dous meses anteriormente citados.

2. Poderá concederse esta subvención a aquelas sociedades limitadas de nova creación que reúnan os requisitos do artigo 2º parágrafo 3 desta orde, polos traballadores e traballadoras desempregados/as que, constituíndose como autónomos/as, teñan a condición de socio/a da devandita sociedade.

O importe máximo desta subvención non poderá superar a contía de 3.000 € por cada socio que cumpra os requisitos e condicións previstos no artigo 2º.1 desta orde.

A sociedade limitada deberá presentar a solicitude da subvención financeira con anterioridade ao inicio da execución do proxecto de investimento, e, en todo caso, antes de transcorresen 2 meses desde a data de alta no IAE ou, se é o caso, no censo de obrigados tributarios do Ministerio de Economía e Facenda, respectando, en todo caso, o prazo xeral establecido no artigo 8º.4 de esta orde, aínda que non transcorresen os dous meses anteriormente citados.

### Artigo 5º.-Rendas para o inicio da actividade.

1. Poderán concederse subvencións de ata 3.000 €, en concepto de renda para o inicio da actividade,

por unha soa vez, para contribuír a garantir durante o inicio da actividade uns ingresos mínimos.

2. A contía da renda para o inicio da actividade non poderá superar o 50% do investimento inicial en activo fixo debidamente acreditado ou, no suposto de constitución dunha sociedade limitada de nova creación, o 50% da achega de diñeiro inicial ao capital social do socio. No caso de que a persoa beneficiaria desta renda sexa unha muller, a dita porcentaxe será do 60%.

3. O prazo de presentación de solicitudes da renda de inicio da actividade será de dous meses desde a data de alta na Seguridade Social ou en mutualidade de colexio profesional, respectando, en todo caso, o prazo xeral establecido no artigo 8º.4 de esta orde, aínda que non transcorresen os dous meses anteriormente citados.

### Artigo 6º.-Axuda excepcional.

1. Poderáselles conceder unha axuda para o financiamento dos primeiros gastos da actividade ás persoas desempregadas dos colectivos relacionados nos seguintes puntos deste artigo, sempre que cumpran os requisitos para ser beneficiarias deste programa, de acordo co previsto no artigo 2º.1 desta orde, agás as que constitúan unha sociedade limitada.

A través desta axuda, que se concederá por unha soa vez, serán subvencionables os gastos realizados nos dous meses anteriores e nos seis meses seguintes ao inicio da actividade nos seguintes conceptos: compra de mercadorías, materias primas e outros aprovisionamentos, publicidade, arrendamento de local e maquinaria.

Para a data de inicio da actividade observarase o disposto no artigo 2º.2 desta orde.

2. A contía desta subvención será de ata 800 € para os seguintes colectivos:

a) Persoas desempregadas maiores de 45 anos.

b) Persoas desempregadas que realizasen, no ano da presentación da solicitude ou nos dous anos naturais anteriores, cursos de formación profesional ocupacional do Plan FIP directamente relacionados coa actividade empresarial.

c) Persoas desempregadas que participasen, no ano de presentación da solicitude ou nos dous anos anteriores, como alumnos e alumnas en escolas obradoiro, casas de oficios ou en obradoiros de emprego directamente relacionados no seu contido coa actividade empresarial, ou ben que traballasen no ano da presentación da solicitude ou no ano anterior, en obras ou servizos de interese xeral realizados en virtude doutros programas de fomento do emprego.

3. A contía desta subvención será de ata 1.600 € para os seguintes colectivos:

a) Mulleres desempregadas.

b) Traballadores e traballadoras desempregados/as procedentes de empresas en crise.

c) Persoas desempregadas de longa duración que estivesen sen traballo e inscritas na oficina de emprego durante polo menos 12 dos anteriores 16 meses.

4. A contía desta subvención será de ata 2.400 € para os seguintes colectivos:

a) Mozos e mozas menores de 30 anos.

b) Mulleres desempregadas que se reincorporen ao mercado laboral tras unha ausencia non inferior a 24 meses.

c) Mulleres desempregadas que creen o seu posto de traballo naquelas actividades económicas con menor índice de emprego feminino, de acordo co disposto na orde do Ministerio de Traballo e Asuntos Sociais do 16 de setembro de 1998 (BOE do 29 de setembro).

d) Persoas desempregadas responsables dunha familia monoparental e con cargas familiares.

5. A contía desta subvención será de ata 3.000 € para os seguintes colectivos:

-Persoas perceptoras da Renda de Integración Social de Galicia ou aquelas que non poidan acceder a ela, ben por falta do período exixido de residencia ou empadramento, ou ben por ter esgotado o período máximo de percepción legalmente establecido, ou membros da súa unidade familiar en desemprego.

-Persoas que participen ou participasen en procesos de rehabilitación ou reinserción social de drogodependentes debidamente acreditados ou autorizados.

-Internos e internas de centros penitenciarios cuxa situación penitenciaria lles permita acceder a un emprego, así como liberados/as condicionais ou ex-reclusos/as que non tivesen antes un primeiro emprego fixo remunerado tras un período de privación de liberdade.

-Mulleres procedentes de casas de acollida que presenten problemas adicionais de inserción ou reinserción laboral.

-As persoas que teñan acreditada pola Administración competente a condición de vítima de violencia doméstica por parte dalgún membro da unidade familiar de convivencia.

-Mulleres que abandonaran o exercicio da prostitución e se incorporen ao mercado laboral.

-Menores internos incluídos/as no ámbito de aplicación da Lei orgánica 5/2000, do 12 de xaneiro, reguladora da responsabilidade penal dos menores, cuxa situación lles permita acceder a un emprego, así como os que estean en situación de liberdade vixiada e os ex-reclusos e ex-reclusas.

-Mozos e mozas que estean ou estivesen ata a súa maioría de idade baixo a tutela ou garda da Administración autonómica.

-Traballadores e traballadoras inmigrantes que pasen a ser residentes da comunidade cuxas características condicionen a súa integración social.

-Emigrantes retornados/as con graves necesidades persoais ou familiares.

-Persoas que formen parte de colectivos ou minorías cuxas características poidan condicionar as súas posibilidades de integración social.

6. No suposto de que as características da persoa desempregada dea lugar á súa inclusión en máis dun colectivo, só será posible aplicar a contía da subvención respecto dun deles, correspondendo a opción á persoa solicitante.

7. A solicitude de axuda excepcional deberá presentarse no prazo dos seis meses desde a data de alta na Seguridade Social ou en mutualidade de colexio profesional, respectando, en todo caso, o prazo xeral establecido no artigo 8º.4 de esta orde, aínda que non transcorresen os seis meses anteriormente citados.

### Capítulo III

#### Competencia e procedemento

##### Artigo 7º.-Competencia.

A competencia para coñecer e resolver as solicitudes de axudas e subvencións previstas nesta orde, por delegación do conselleiro de Traballo, corresponderalles aos delegados e delegadas provinciais da Consellería de Traballo, no respectivo ámbito provincial onde o solicitante desenvolva a súa actividade empresarial ou profesional, segundo consta na alta do imposto de actividades económicas ou alta no censo de obrigados tributarios do Ministerio de Economía e Facenda.

##### Artigo 8º.-Solicitudes e prazo.

1. As solicitudes de axudas e subvencións dirixiranse ao órgano competente para resolver, e presentaranse nos rexistros das respectivas delegacións provinciais da Consellería de Traballo, ou por calquera das formas previstas no artigo 38.4º da Lei 30/1992, do 26 de novembro, modificada pola Lei 4/1999, do 13 de xaneiro, de réxime xurídico das administracións públicas e do procedemento administrativo común.

2. A presentación da solicitude de subvención polo interesado comportará a autorización ao órgano xestor para solicitar as certificacións que deban emitir a Axencia Estatal da Administración Tributaria, a Tesouraría Xeral da Seguridade Social e a Consellería de Economía e Facenda da Xunta de Galicia, segundo o establecido no artigo 43 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006 (DOG nº 250, do 30 de decembro).

3. As solicitudes e os anexos deste programa están dispoñibles na páxina web da Consellería de Traballo [www.xunta.es/emprego](http://www.xunta.es/emprego).

4. O prazo xeral para a presentación de solicitudes de axudas do programa para a promoción do emprego autónomo finalizará o 15 de setembro de 2006, aínda que non transcorresen os prazos específicos previstos para cada tipo de axuda.

5. Para a presentación de solicitudes os beneficiarios poderán contar co asesoramento dos técnicos de emprego da rede coordinada pola Consellería de Traballo ([www.tecnicosempregogalicia.xunta.es](http://www.tecnicosempregogalicia.xunta.es)).

6. As actuacións subvencionables do programa para a promoción do emprego autónomo, realizadas entre o 1 de outubro do ano 2005 e a data de publicación desta orde, poderán acollerse ás axudas desta, aínda que transcorrese o prazo establecido desde a alta na Seguridade Social ou mutualidade do colexio profesional, ou se tivese iniciado a execución do proxecto de investimento. O prazo para a presentación destas solicitudes remata o 31 de maio de 2006.

#### Artigo 9º.-Documentación.

As solicitudes deberán presentarse nos modelos normalizados que figuran como anexos numéricos a esta orde, e deberán ir acompañadas, do orixinal ou fotocopia compulsada, da seguinte documentación:

a) DNI e acreditación do NIF da persoa solicitante e, no suposto de constitución dunha sociedade limitada, escritura de constitución, CIF da empresa, DNI e poder suficiente da persoa representante da sociedade. No caso dunha comunidade de bens ou sociedade civil, escritura de constitución e CIF da empresa.

b) Documentos acreditativos dos períodos de inscrición como demandante de emprego na oficina pública de emprego, así como do tempo de permanencia no paro segundo os datos do informe da vida laboral na Tesouraría Xeral da Seguridade Social.

De ser o caso, certificado do colexio profesional de alta no dito colexio, con indicación de se presupon ou non exercicio da actividade, e certificado da mutualidade do colexio profesional con indicación dos períodos de alta nela.

No suposto de que se solicite subvención financeira con anterioridade ao inicio da actividade, esta documentación deberá achegarse na fase de xustificación do pagamento.

c) De ser o caso, documentos acreditativos das circunstancias sinaladas no artigo 2º parágrafo 3.

d) Alta no imposto de actividades económicas ou, se é o caso, alta no censo de obrigados tributarios no Ministerio de Economía e Facenda. Alta no correspondente réxime da Seguridade Social ou, de ser o caso, en colexio profesional e mutualidade que corresponda.

No suposto de que se solicite subvención financeira con anterioridade ao inicio da actividade, esta documentación deberá achegarse na fase de xustificación do pagamento.

e) Memoria económica do proxecto empresarial asinada pola persoa solicitante que inclúa orzamento de investimento e o plan de financiamento que acredite a viabilidade do proxecto, xunto con facturas ou, no seu defecto, facturas proforma ou orzamento dos activos que se vaian ter en conta para o cálculo da contía da subvención.

f) Nos casos en que se solicite subvención financeira, xuntarase o compromiso da entidade financeira sobre a concesión do préstamo, en que figuren as súas características e se faga constar que a operación se acolle ao convenio suscrito para tal fin (segundo o modelo do anexo VIII) ou, de ser o caso, o contrato de préstamo.

g) No caso que se solicite a renda para o inicio de actividade e se constituía unha sociedade limitada, documento acreditativo do desembolso total da achega inicial ao capital social da sociedade.

h) No suposto de que se solicite a axuda excepcional, documentación acreditativa da concorrencia das circunstancias que determinen a pertenza aos colectivos establecidos no artigo 6º desta orde, e achegarse o anexo III no que se indicará o colectivo polo que se solicita a axuda.

i) Declaración comprensiva do conxunto de todas as solicitudes efectuadas ou concedidas para o mesmo proxecto ou actividade, polas administracións públicas competentes ou outros entes públicos ou, de ser o caso, unha declaración de que non solicitou nin percibiu outras axudas ou subvencións (segundo o modelo do anexo VI).

j) Ficha de solicitude de transferencia bancaria e certificación da entidade financeira acreditativa de que o solicitante é titular da conta (segundo o modelo do anexo VII).

#### Artigo 10º.-Instrución e tramitación.

Se a solicitude non estivese debidamente cuberta ou non se achegase a documentación exixida, as unidades administrativas encargadas da tramitación do expediente, de conformidade co disposto no artigo 71 da Lei 30/1992, do 26 de novembro, de réxime xurídico das administracións públicas e do procedemento administrativo común, requirirán do interesado para que, nun prazo de 10 días, emende a falta ou presente os documentos preceptivos, coa advertencia de que, se así non o fixese, se considerará desistido da súa petición, logo de resolución, que deberá ser ditada nos termos previstos no artigo 42 da antedita lei.

#### Artigo 11º.-Resolución e recursos.

1. Logo da fiscalización polas respectivas intervencións das propostas emitidas polos correspondentes servizos, as resolucións serán ditadas polo órgano competente, por delegación do conselleiro de Traballo, e deberán serlles notificadas aos interesados. As resolucións concesorias ou denegatorias deberán ser sempre motivadas.

2. O prazo para resolver e notificar a resolución será de seis meses, que se computará desde a data de entrada da solicitude no rexistro do órgano competente para a súa tramitación. Transcorrido o dito prazo sen que se ditase resolución expresa, entenderase desestimada a solicitude de acordo co establecido no artigo 1 e no artigo 2 da Lei 6/2001, do 29 de xuño, de adecuación da normativa da Comunidade Autónoma de Galicia á Lei 4/1999, do 13 de xaneiro, de modificación da Lei 30/1992, do 26 de novembro, de réxime xurídico das administracións públicas e do procedemento administrativo común.

3. As resolucións que se diten neste procedemento esgotan a vía administrativa e contra elas cabe interpor recurso contencioso-administrativo no prazo de dous meses, ante o órgano competente da xurisdición contencioso-administrativa, e poderá formularse, con carácter potestativo, recurso de reposición, no prazo dun mes, ante o mesmo órgano que ditou a resolución impugnada, de conformidade co disposto na Lei 29/1998, do 13 de xullo, reguladora da xurisdición contencioso-administrativa, e na Lei 30/1992, do 26 de novembro, de réxime xurídico das administracións públicas e do procedemento administrativo común.

#### Artigo 12º.-Xustificación do pagamento.

1. De non achegarse con anterioridade, o pagamento das axudas quedará condicionado á presentación, do orixinal ou copia compulsada, no prazo, nos termos e na forma que se estableza na resolución de concesión, da documentación común e específica que se exixa de forma expresa nela, entre a cal deberá figurar a relacionada nos puntos seguintes:

##### A) Documentación xeral:

a) Documentación xustificativa para acreditar o cumprimento da finalidade para a cal se concedeu a subvención, segundo o tipo de axuda.

b) Declaración complementaria do establecido no artigo 9º alínea i) desta orde, do conxunto das axudas solicitadas, tanto das aprobadas ou concedidas como das pendentes de resolución para o mesmo proxecto das distintas administracións públicas competentes ou outros entes públicos. Ou, de ser o caso, de que non solicitou nin percibiu outras axudas ou subvencións (anexo VI).

##### B) Documentación específica:

a) Cando se trate da subvención financeira de redución de xuros, xuntarase copia do contrato de préstamo, e facturas acreditativas de que o importe do préstamo subvencionado foi destinado a financiar os investimentos obxecto de subvención. Con posterioridade, o beneficiario no prazo de trinta días desde a data de pagamento da subvención deberá presentar certificación da entidade financeira acreditativa da amortización do principal do préstamo na contía subvencionada.

De non achegarse xunto á solicitude a alta no imposto de actividades económicas ou, se é o caso, alta no censo de obrigados tributarios no Ministerio de Economía e Facenda; alta no correspondente réxime da Seguridade Social ou, de ser o caso, en colexio profesional e mutualidade que corresponda; e no suposto de constitución dunha sociedade limitada, escritura pública de constitución.

DNI e documentos acreditativos dos períodos de inscrición como demandantes de emprego na oficina pública de emprego, así como do tempo de permanencia en situación de desemprego, segundo os datos do informe da vida laboral da Tesouraría Xeral da Seguridade Social do solicitante, ou das persoas incorporadas á sociedade limitada polas cales se solicite subvención, de non telo presentado con anterioridade.

b) Cando se trate da renda para o inicio da actividade, documentación acreditativa, se é o caso, do investimento en activo fixo.

c) Cando se trate da axuda excepcional, facturas acreditativas dos gastos obxecto da subvención.

2. Malia o sinalado nos puntos anteriores, a documentación exixida para a fase de pagamento común ou específica, poderá presentarse xunto coa solicitude, á opción do interesado. Neste suposto poderán tramitarse conxuntamente a concesión e o pagamento da axuda.

3. Cando concorran varias axudas ou subvencións só será necesario presentar unha vez a documentación coincidente, tanto na fase de solicitude como na de xustificación.

4. Non poderá realizarse en ningún caso o pagamento da subvención en tanto o beneficiario non figure ao día do cumprimento das súas obrigas tributarias -estatais e autonómicas- e da Seguridade Social, sexa debedor en virtude de resolución declarativa da procedencia de reintegro ou teña algunha débeda pendente, por calquera concepto, coa Administración da comunidade autónoma.

## Capítulo IV Incompatibilidades e obrigas

#### Artigo 13º.-Incompatibilidades e concorrencia.

1. En ningún caso o importe das axudas concedidas ao abeiro desta orde poderá ser de tal contía que, illadamente ou en concorrencia coas concedidas por outras administracións ou entes públicos ou privados, nacionais ou internacionais, supere o custo total da actividade que vaia desenvolver o beneficiario.

2. As axudas e subvencións establecidas neste programa son incompatibles coas establecidas nos programas de fomento do emprego en cooperativas e sociedades laborais, iniciativas de emprego, iniciativas de emprego de base tecnolóxica e integración laboral das persoas con discapacidade.

3. Non se poderán imputar os mesmos gastos aos distintos tipos de axuda previstos neste programa, agás nos supostos de rendas para o inicio da actividade, en que só se utilizarán como parámetro para o cálculo da contía da subvención.

Artigo 14º.-Obrigas dos beneficiarios.

Son obrigas dos beneficiarios das axudas e subvencións:

a) Estar ao corrente das súas obrigas tributarias estatais e autonómicas e da Seguridade Social, así como non ter pendente de pagamento ningunha outra débeda, por ningún concepto, coa Administración pública da comunidade autónoma, con anterioridade a ditarse a proposta de resolución de concesión e realizar a proposta de pagamento da subvención.

b) Realizaren a actividade que fundamente a concesión da axuda ou subvención durante un tempo mínimo de tres anos, salvo cesamento por causas alleas á súa vontade, o que deberá acreditar fidedignamente.

c) Comunicarlle ao órgano concedente calquera modificación das condicións tidas en conta para a concesión da subvención, así como dos compromisos e obrigas asumidos polos beneficiarios e, de ser o caso, a obtención concorrente de subvencións, axudas, ingresos ou recursos que financien as actividades subvencionadas. Esta comunicación deberá efectuarse tan pronto como se coñeza, e en todo caso con anterioridade á xustificación da aplicación dada aos fondos percibidos.

d) Adoptar as medidas axeitadas de difusión para dar publicidade ao financiamento público das actuacións subvencionadas pola Consellería de Traballo, así como, se é o caso, cofinanciadas polo Fondo Social Europeo, nos termos establecidos no Regulamento (CE) 1159/2000, da Comisión, do 30 de maio, sobre actividades de información e publicidade.

e) O sometemento ás actuacións de control, comprobación e inspección que efectuará a Consellería de Traballo, ás de control financeiro que correspondan, se é o caso, á Intervención Xeral da comunidade autónoma, ás previstas na lexislación do Tribunal de Contas e o Consello de Contas, ou a outros órganos da Administración do Estado ou da Unión Europea e achegar canta información lle sexa requirida no exercicio das actuacións anteriores.

f) No caso de constitución dunha sociedade limitada os socios/as polos cales se conceda a subvención quedan obrigados a manter a súa achega ao capital social e a súa porcentaxe de participación no capital social durante un período mínimo de tres anos. Para estes efectos no primeiro trimestre de cada ano natural e durante o período de tempo sinalado, o beneficiario deberá presentar certificación do Rexistro Mercantil sobre as variacións no capital social desde a data da constitución da sociedade, e declaración do órgano da administración, con relación á información que conste no libro de socios/as, respecto

á titularidade e as alteracións producidas desde a data da constitución.

As persoas físicas beneficiarias de calquera axuda deste programa deberán manter durante un período mínimo de tres anos a forma empresarial elixida pola que se lles concedeu as axudas ou subvencións.

g) Aquelas outras obrigas establecidas no artigo 78 do texto refundido da Lei de réxime financeiro e orzamentario de Galicia aprobado polo Decreto lexislativo 1/1999, do 7 de outubro, conforme a redacción dada pola Lei 14/2004, do 29 de decembro, de medidas tributarias e de réxime administrativo.

Artigo 15º.-Modificación da resolución de concesión.

Toda alteración das condicións tidas en conta para a concesión das axudas ou subvencións, así como a obtención concorrente de subvencións e axudas outorgadas por outras administracións ou outros entes públicos ou privados, nacionais ou internacionais, poderá dar lugar á modificación da resolución de concesión e, eventualmente, á súa revogación.

Artigo 16º.-Revogación e reintegro.

Procederá a revogación das subvencións e axudas, así como o reintegro total ou parcial das cantidades percibidas e a exixencia do xuro de demora, nos casos e nos termos previstos no artigo 78 do texto refundido da Lei de réxime financeiro e orzamentario de Galicia e no Decreto 287/2000, do 21 de novembro, polo que se desenvolve o réxime de axudas e subvencións públicas da Comunidade Autónoma de Galicia.

A obriga de reintegro establecida no parágrafo anterior enténdese sen prexuízo do establecido no Real decreto lexislativo 5/2000, do 4 de agosto, polo que se aproba o texto refundido da Lei sobre infraccións e sancións na orde social.

Artigo 17º.-Seguimento e control.

As delegacións provinciais e a Dirección Xeral de Promoción do Emprego poderán comprobar, en todo momento, a aplicación das subvencións concedidas para os fins programados. Para estes efectos os beneficiarios deberán cumprir as obrigas de comprobación que se establezan nesta orde e na resolución de concesión.

#### *Disposicións adicionais*

Primeira.-Sen prexuízo das facultades que teñan atribuídas outros órganos da Administración do Estado ou da comunidade autónoma, a Consellería de Traballo levará a cabo funcións de control, así como de avaliación e seguimento dos programas.

Para realizar as ditas funcións poderanse utilizar cantos medios estean ao dispor da Consellería de Traballo para comprobar o cumprimento dos requisitos exixidos nesta orde e demais normas vixentes que resulten de aplicación.



Segunda.-A Consellería de Traballo poderá requirir en todo momento a documentación orixinal que se considere necesaria para acreditar mellor o exacto cumprimento das condicións exixidas nos diferentes programas desta orde, agás aquela que de acordo co artigo 35 f) da Lei 30/1992, do 26 de novembro, de réxime xurídico das administracións públicas e do procedemento administrativo común, xa se atopen en poder da Administración actuante.

Terceira.-Apróbase a delegación de atribucións do conselleiro de Traballo nos delegados/as provinciais, no ámbito das súas respectivas provincias, para resolver a concesión ou denegación das axudas e subvencións previstas nesta orde, así como para autorizar, dispor, recoñecer a obriga e propor os correspondentes pagamentos.

Cuarta.-Para os efectos do sinalado no artigo 6º.3 desta orde, terán a consideración de traballadores e traballadoras desempregados/as procedentes de empresas en crise aqueles traballadores e traballadoras cuxa relación laboral se extinga por algunha das causas sinaladas nos artigos 51 e 52 c) do Estatuto dos traballadores.

Para os efectos do sinalado no artigo 6º.4 desta orde, terá a consideración de persoa titular dunha familia monoparental e con cargas familiares, aquela persoa solteira, viúva, separada ou divorciada que teña ao seu coidado fillos/as menores de 21 anos ou persoas maiores incapacitadas que non obteñan ingresos de calquera natureza superiores ao 75% do salario mínimo interprofesional vixente no momento da solicitude.

Para os efectos do sinalado no artigo 6º.5, terán a consideración de retornados/as, aqueles emigrantes que cumpran coa condición de que non transcorresen máis de dous anos, entre a data do retorno e a data de alta no correspondente réxime da Seguridade Social.

Quinta.-A concesión das axudas e subvencións previstas nesta orde estará suxeita á existencia de crédito orzamentario.

O pagamento das axudas e subvencións reguladas nesta orde financiaranse con cargo aos créditos da aplicación orzamentaria que, mediante disposición complementaria, se determinen anualmente, logo da aprobación dos orzamentos xerais da comunidade autónoma para o exercicio correspondente.

Sexta.-No exercicio económico 2006, as axudas recollidas nesta orde, entre outras, financiaranse con cargo ás aplicacións orzamentarias 16.02.241A.470.1, código de proxecto 2003 00450, cun crédito de 9.003.282 €; 16.02.241A.470.2, código de proxecto 2002 14439, cun crédito de 4.142.692 € e 16.02.241A.470.3, código de proxecto 2002 14823, cun crédito de 6.300.000 €; 16.02.241A.470.4, código de proxecto 2005 00358, cun crédito de 3.000.000 €; 16.02.241.A 470.4, código de proxecto 2005 00361, cun crédito de 10.000.000 €

16.02.241.A.470.4, código de proxecto 2005 00362, cun crédito de 5.000.000 €; 16.02.241A.470.5, código de proxecto 2006 00376, cun crédito de 2.500.000 €; 16.02.241B.470.0, código de proxecto 2002 14109, cun crédito de 750.383 €; 16.02.241B.470.2, código de proxecto 2004 00340, cun crédito de 1.066.065 €. Estas contías están recollidas na Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, e constitúen o importe global das aplicacións para o financiamento desta orde, da orde pola que se establecen as bases reguladoras dos programas de incentivos á contratación por conta allea como medida para favorecer a inserción dos mozos e mozas menores de 30 anos, cofinanciados polo Fondo Social Europeo, e se procede á súa convocatoria para o ano 2006 e das demais ordes que establezan as bases das medidas de promoción do emprego, incentivos á contratación por conta allea e actuacións de apoio a persoas emprendedoras, autoemprego e economía social, incluídas nos programas orzamentarios 241A e 241B.

Así mesmo, os créditos consignados nesta orde poderán ser obxecto de modificacións como consecuencia da asignación ou da redistribución de fondos para o financiamento dos programas de fomento do emprego, coas limitacións que estableza a Conferencia Sectorial de Asuntos Laborais ou polas disposicións aplicables ás axudas cofinanciadas polo Fondo Social Europeo.

#### *Disposición transitoria*

Os expedientes de subvención que se atoparan en tramitación unha vez finalizado o exercicio económico 2005, resolveranse con cargo aos créditos orzamentarios destinados para o dito fin para o ano 2006, en función da normativa que lles era de aplicación no momento de presentación da solicitude, sempre que se cumpran os seguintes requisitos:

- a) Que se acredite o motivo que impediu resolver en prazo.
- b) Que o expediente non fose resolto de forma expresa e non fose impugnado o efecto do silencio.
- c) Que o solicitante non manifeste expresamente a súa vontade de desistencia da solicitude presentada.

#### *Disposicións derradeiras*

Primeira.-Facúltase o director xeral de Promoción do Emprego para que dite, no ámbito das súas competencias, as resolucións e instrucións necesarias para o desenvolvemento e cumprimento desta orde.

Segunda.-Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 20 de marzo de 2006.

Ricardo Jacinto Varela Sánchez  
Conselleiro de Traballo

ANEXO I



**XUNTA DE GALICIA**  
CONSELLERÍA DE TRABALLO

UNION EUROPEA  
Fondo Social Europeo



EXPEDIENTE
------------

PROCEDEMENTO <b>PROMOCIÓN DE EMPREGO AUTÓNOMO: (INDICAR CUN "X" AS QUE SE SOLICITEN)</b> <input type="checkbox"/> RENDA PARA O INICIO DA ACTIVIDADE <input type="checkbox"/> AXUDA EXCEPCIONAL	CÓDIGO DO PROCEDEMENTO <b>TR341D</b>	DOCUMENTO <b>SOLICITUDE</b>
---	---	--------------------------------

**DATOS DE IDENTIFICACIÓN DO SOLICITANTE**

APELIDOS	NOME	DATA DE NACEMENTO	DNI
DATA DE ALTA NA SEGURIDADE SOCIAL	Nº INSCRICIÓN SS	DATA ALTA NO IAE	
DOMICILIO SOCIAL			
LOCALIDADE / CONCELLO	PROVINCIA	CÓDIGO POSTAL	TELÉFONO - FAX
PERCEPTOR PAGAMENTO ÚNICO PRESTACIÓN DESEMPREGO <input type="checkbox"/> SI <input type="checkbox"/> NO <input type="checkbox"/>	TEMPO DE PERMANENCIA EN DESEMPREGO		

**DATOS DE IDENTIFICACIÓN DO PROXECTO DE NEGOCIO**

ACTIVIDADE ECONÓMICA (DESCRICIÓN)	CNAE			
ENDEREZO DO NEGOCIO				
<input type="checkbox"/> AUTÓNOMO INDIVIDUAL <input type="checkbox"/> COMUNIDADE DE BENS OU SOCIEDADE CIVIL <input type="checkbox"/> SOCIEDADE LIMITADA	NOME _____ Nº DE SOCIOS _____ CIF _____			
LOCALIDADE	CONCELLO	PROVINCIA	CÓDIGO POSTAL	TELÉFONO
INVESTIMENTO QUE SE VAI REALIZAR ACTIVO FIXO (EUROS) _____ ACTIVO CIRCULANTE (EUROS) _____		FINANCIAMENTO FONDOS PROPIOS _____ FONDOS ALLEOS _____		

**DOMICILIO PARA EFECTOS DE NOTIFICACIÓN**

ENDEREZO			
LOCALIDADE / CONCELLO	PROVINCIA	CÓDIGO POSTAL	TELÉFONO-FAX

**DECLARA QUE:**

- a) Todos os datos que constan nesta solicitude e nos documentos que se xuntan son certos.
- b) Non se incorre en ningunha das incompatibilidades sinaladas no artigo 14 da orde de convocatoria.
- c) Se cumpren os requisitos e non concorren as causas de exclusión previstas no artigo 2 da orde de convocatoria.
- d) Indicar o que corresponde:
  - Non ter solicitado nin percibido para este proxecto ningunha outra axuda dunha administración ou entidade pública.
  - Ter percibido ou solicitado as axudas indicadas na relación que se xunta (no modelo que figura como anexo VI).
- e) Comunicaranlle ao órgano que conceda a axuda calquera modificación das condicións tidas en conta no momento da concesión, así como dos compromisos e obrigas asumidas polo beneficiario e, se é o caso, a obtención de subvencións ou axudas, ingresos ou recursos que financien as actividades subvencionadas.
- f) Sométese ás actuacións de control, comprobación ou inspección que efectúe a Consellería de Traballo e ás de control financeiro que lle correspondan, se é o caso, á Intervención Xeral da Comunidade Autónoma, ás previstas na lexislación do Tribunal de Contas e do Consello de Contas, ou a outros órganos da Administración do Estado ou da Unión Europea.
- g) Indicar o que corresponde:
  - Solicitou a subvención financeira con data \_\_\_\_\_
  - Vai solicitar a subvención financeira.
- h) Autoriza a obtención dos certificados establecidos no artigo 8º.2 da orde de convocatoria.

**e SOLICITA:**

Nos termos descritos na documentación que se xunta, relacionada no anexo II, as subvencións indicadas na parte superior.

LEXISLACIÓN APLICABLE  <i>Orde do 20 de marzo de 2006 pola que se establecen as bases reguladoras do programa para a promoción do emprego autónomo cofinanciado polo Fondo Social Europeo e se procede á súa convocatoria para o ano 2006.</i>
SINATURA DO SOLICITANTE OU PERSOA QUE O REPRESENTA  _____ de _____ de 2006

(Para cubrir pola Administración)		NÚMERO DE EXPEDIENTE
RECIBIDO	REVISADO E CONFORME	DATA DE ENTRADA / /
		DATA DE EFECTOS / /
		DATA DE SAIDA / /

Delegado/a provincial de \_\_\_\_\_

## ANEXO II

## PROMOCIÓN DO EMPREGO AUTÓNOMO

EXPEDIENTE

DOCUMENTACIÓN QUE SE XUNTA (ARTIGOS 9º E 12º ORDE DE CONVOCATORIA)  
(INDÍQUESE CUN "X" A QUE SE PRESENTA)

- DNI E ACREDITACIÓN DO NIF DO SOLICITANTE (ARTIGO 9º).
- NO SUPOSTO DE CONSTITUCIÓN DUNHA SOCIEDADE LIMITADA E ESCRITURA PÚBLICA DE CONSTITUCIÓN (ARTIGO 9º).
- NO CASO DUNHA COMUNIDADE DE BENS OU SOCIEDADE CIVIL, ESCRITURA DE CONSTITUCIÓN E CIF DA EMPRESA (ARTIGO 9º).
- DOCUMENTACIÓN ACREDITATIVA DOS PERÍODOS DE INSCRICIÓN COMO DEMANDANTE DE EMPREGO NA OFICINA DE EMPREGO E DO TEMPO DE PERMANENCIA NO PARO SEGUNDO OS DATOS DO INFORME DA VIDA LABORAL NA TESOURARÍA XERAL DA SEGURIDADE SOCIAL (ARTIGO 9º).
- SE É O CASO, CERTIFICADO DA ALTA NO COLEXIO PROFESIONAL E DOS PERÍODOS DE ALTA NA MUTUALIDADE DO COLEXIO PROFESIONAL, CON INDICACIÓN DE SE PRESUPONEN OU NON EXERCICIO DA ACTIVIDADE (ARTIGO 9º).
- ALTA NO IAE OU, SE É O CASO, ALTA NO CENSO DE OBRIGADOS TRIBUTARIOS NO MINISTERIO DE ECONOMÍA E FACENDA. ALTA NO CORRESPONDENTE RÉXIME DA SEGURIDADE SOCIAL OU, DE SER O CASO, EN COLEXIO PROFESIONAL OU MUTUALIDADE QUE CORRESPONDA (ARTIGO 9º).
- MEMORIA ECONÓMICA DO PROXECTO EMPRESARIAL ASINADA POLO SOLICITANTE QUE INCLÚA ORZAMENTO DE INVESTIMENTO E O PLAN FINANCEIRO QUE ACREDITE A VIABILIDADE DO PROXECTO, XUNTO CON FACTURAS OU, NO SEU DEFECTO, FACTURAS PRO FORMA OU ORZAMENTO DOS ACTIVOS QUE SE VAN FINANCIAR (ARTIGO 9º).
- NO CASO QUE SE SOLICITE A RENDA PARA O INICIO DA ACTIVIDADE E SE CONSTITÚA UNHA SOCIEDADE LIMITADA, DOCUMENTACIÓN ACREDITATIVA DO DESEMBOLSO TOTAL DA ACHEGA INICIAL AO CAPITAL SOCIAL DA SOCIEDADE, E SE É O CASO, DOCUMENTACIÓN ACREDITATIVA DA CONCORRENCIA DAS CIRCUNSTANCIAS SINALADAS NO ARTIGO 2.3 DA ORDE DE CONVOCATORIA (ARTIGO 9º). DOCUMENTACIÓN ACREDITATIVA, SE É O CASO, DO INVESTIMENTO EN ACTIVO FIXO (ARTIGO 12º).
- CANDO SE TRATE DE AXUDA EXCEPCIONAL, DOCUMENTACIÓN ACREDITATIVA DA CONCORRENCIA DAS CIRCUNSTANCIAS QUE DETERMINEN A PERTENZA AOS COLECTIVOS ESTABLECIDOS NO ARTIGO 6º DA ORDE DE CONVOCATORIA E ANEXO III (ART. 9) E FACTURAS ACREDITATIVAS DOS GASTOS OBXETO DE SUBVENCIÓN (ART. 12º).
- DECLARACIÓN COMPRENSIVA DO CONXUNTO DE AXUDAS OU SUBVENCIÓNS PARA O MESMO PROXECTO OU ACTIVIDADE SOLICITADAS OU CONCEDIDAS PERANTE AS ADMINISTRACIÓNS OU ENTIDADES PÚBLICAS NO MODELO ANEXO VI (ARTIGO 9º). OU, NOUTRO CASO, DECLARACIÓN DE QUE NON SOLICITOU NIN PERCIBIU OUTRAS AXUDAS NO MODELO DE SOLICITUDE.
- FICHA DE SOLICITUDE DE TRANSFERENCIA BANCARIA E CERTIFICACIÓN DA ENTIDADE FINANCEIRA ACREDITATIVA DE QUE O SOLICITANTE É TITULAR DA CONTA SEGUNDO MODELO ANEXO VII (ARTIGO 9º).

\* A documentación exixida no artigo 9º ten que presentarse xunto coa solicitude.

\* A documentación exixida no artigo 12º é necesaria para proceder ao pagamento da subvención, non obstante e para axilizar a tramitación do expediente, poderá ser presentada xunto coa solicitude a opción do interesado.

\*\* Cando se soliciten dous tipos de axuda só será necesario presentar unha vez a documentación coincidente indicándoo na solicitude. Debe identificarse con claridade os tipos de axuda que se solicitan, marcándoas cun "X" no primeiro recadro do modelo de solicitude.

## PRAZOS PARA A PRESENTACIÓN DE SOLICITUDES

- A RENDA PARA O INICIO DA ACTIVIDADE DEBERÁ PRESENTARSE NO PRAZO DE DOUS MESES DESDE A DATA DA ALTA NA SEGURIDADE SOCIAL OU MUTUALIDADE DO COLEXIO PROFESIONAL RESPECTANDO, EN TODO CASO, O PRAZO XERAL ESTABLECIDO NO ARTIGO 8º.4 DA ORDE DE CONVOCATORIA, AÍNDA QUE NON TRANSCORRESEN OS DOUS MESES ANTERIORMENTE CITADOS (ARTIGO 5º).
- A AXUDA EXCEPCIONAL DEBERÁ PRESENTARSE NO PRAZO DE SEIS MESES DESDE A DATA DE ALTA NA SEGURIDADE SOCIAL OU MUTUALIDADE DO COLEXIO PROFESIONAL RESPECTANDO, EN TODO CASO, O PRAZO XERAL ESTABLECIDO NO ARTIGO 8º.4 DA ORDE DE CONVOCATORIA, AÍNDA QUE NON TRANSCORRESEN OS SEIS MESES ANTERIORMENTE CITADOS (ARTIGO 6º).
- O PRAZO XERAL PARA A PRESENTACIÓN DE SOLICITUDES FINALIZARÁ O 15 DE SETEMBRO DE 2006, AÍNDA QUE NON TRANSCORRESEN OS PRAZOS ESPECÍFICOS PREVISTOS PARA CADA TIPO DE AXUDA (ARTIGO 8º.4).
- AS ACTUACIÓNS SUBVENCIONABLES DO PROGRAMA PARA A PROMOCIÓN DO EMPREGO AUTÓNOMO, REALIZADAS ENTRE O 1 DE OUTUBRO DO ANO 2005 E A DATA DE PUBLICACIÓN DESTA ORDE, PODERÁN ACOLLERSE ÁS AXUDAS DESTA, AÍNDA QUE TRANSCORRESE O PRAZO ESTABLECIDO DENDE A ALTA NA SEGURIDADE SOCIAL OU MUTUALIDADE DO COLEXIO PROFESIONAL, OU SE TIVESE INICIADO A EXECUCIÓN DO PROXECTO DE INVESTIMENTO, O PRAZO PARA A PRESENTACIÓN DESTAS SOLICITUDES REMATA O 31 DE MAIO DE 2006.